



半身不遂論叙

醫家立言著書。心存濟世者。乃良善之心也。必須親  
治其症。屢驗方法。萬無一失。方可傳與後人。若一症  
不明。留與後人再補。斷不可徒取虛名。恃才立論。病  
未經見。揣度立方。倘病不知源。方不對症。是以活人  
之心。遺作殺人之事。可不畏歟。如傷寒。瘟疫。雜症。婦  
科。古人各有所長。對症用方。多半應手取效。其中稍  
有偏見。不過白玉微瑕。惟半身不遂一症。古之著書  
者。雖有四百餘家。於半身不遂立論者。僅止數人。數

人中並無一人說明病之本源。病不知源。立方安得無錯。余少時遇此症。始遵靈樞素問仲景之論。治之無功。繼遵河間東垣丹溪之論。投藥罔效。輾轉躊躇。幾至束手。伏思張仲景論傷寒。吳又可著瘟疫。皆獨出心裁。並未引古經一語。余空有活人之心。而無濟世之手。凡遇是症。必細心研究。審氣血之榮枯。辨經絡之通滯。四十年來。頗有所得。欲公之天下。以濟後人。奈不敢以管見之學。駁前人之論。另立方法。自取其罪。友人曰。真曾有確見。屢驗良方。補前人之缺。救

後人之難。不但有功於後世。正是前代之勲臣。又何  
罪之有。余聞斯議。不揣鄙陋。將男婦小兒半身不遂  
癱腿痿症。抽搐筋攣。得病之源。外現之症。屢驗良法。  
難治易治之形狀。及前人所論脈理臟腑經絡之錯  
悞。一一繪圖申明其說。詳述前後。以俟高明。再加補  
助。於醫道豈無小補云爾。

國  
本  
目  
録

終



半身不遂論

半身不遂。病本一體。諸家立論。竟不相同。始而靈樞經曰。虛邪偏客於身半。其入深者。內居榮衛。榮衛衰則真氣去。邪氣獨留。發爲偏枯。偏枯者。半身不遂也。素問曰。風中五臟六腑之俞所中。則爲偏風。張仲景曰。夫風之爲病。當令人半身不遂。三書立論。本源皆專主於風。至劉河間出世。見古人方論無功。另出手眼。云中風者。非肝木之風內動。亦非外中於風。良由將息失宜。內火暴甚。水枯莫制。心神昏昧。卒倒無所

知。其論專主於火。李東垣見河間方論矛盾。又另立論曰。中風者氣虛而風邪中之。病在四旬以後壯盛。希有肥白氣虛者。間亦有之。論中有中腑中臟中血脈中經絡之分。立法以本氣虛外受風邪是其本也。朱丹溪見東垣方症不符。又分途立論。言西北氣寒。有中風。東南氣濕。非真中風。皆因氣血先虛。濕生痰。痰生熱。熱生風也。其論專至於痰。濕痰是其本也。王安道見丹溪論中有東南氣濕非真中風一句。便云靈樞素問仲景所言是真中風。河間東垣丹溪所言

是類中風。虞天民言。王安道分真中風。類中風之說。亦未全是。四方病此者。盡因氣濕痰火挾風而作。何嘗見有真中類中之分。獨張景岳有高人之見。論半身不遂。大體屬氣虛。易中風之名。著非風之論。惟引用內經厥逆。並辨論寒熱血虛。及十二經之見症。與症不符。其方不效者。可惜。先生於此症。閱歷無多。其餘名家所論病因。皆是因風。因火。因氣。因痰之論。所立之方。俱係散風清火順氣化痰之方。有云氣血虛弱而中風邪者。於散風清火方中。加以補氣養血之



藥有云陰虛虧損而中風邪者。於滋陰補腎藥內。佐以順氣化痰之品。或補多而攻少。或補少而攻多。自謂攻補兼施於心有得。今人遵用。仍然無效。又不敢議論古人之非。不曰古方不合今病。便云古今元氣不同。既云方不合病。元氣不同。何得傷寒病麻黃承氣陷胸柴胡應手取效。何得中風門愈風導痰秦艽三化屢用無功。總不思古人立方之本。效與不效。原有兩途。其方効者。必是親治其症。屢驗之方。其不効者。多半病由議論。方從揣度。以議論揣度定論立方。

如何能明病之本源。因何半身不遂。口眼歪斜。因何  
語言蹇澁。口角流涎。因何大便乾燥。小便頻數。毫無  
定見。古今混猜。以一虧損。五成元氣之病。反用攻發  
剋消之方。安得不錯。溯本窮源。非錯於醫。乃錯自著  
書者之手。嗟呼。此何等事。而竟以意度。想當然乎哉。  
半身不遂辨。

或曰。半身不遂。古人風火濕痰之論。諸家層次議駁。  
有証據可憑乎。余曰。卽以仲景傷寒論中風篇云。中  
風則令人頭疼身痛。發熱惡寒。乾嘔自汗。金匱要畧

論傷風則令人鼻塞噴嚏咳嗽聲重鼻流清涕。中風本門又云夫風之爲病。當今人半身不遂。今請問何等風何等中法。令人頭疼身痛發熱惡寒乾嘔自汗。何等風何等中法。則令人鼻塞噴嚏咳嗽聲重鼻流清涕。何等風何等中法。則令人半身不遂。半身不遂若果是風。風之中人必由皮膚入經絡。亦必有由表入裏之症。可查嘗治此症。初得時。並無發熱惡寒。頭疼身痛。目痛鼻乾寒熱往來之表症。既無表症。則知半身不遂。非風邪所中。再者衆人風火濕痰之論。立

說更爲含混。如果是風火濕痰。無論由外中。由內發。必歸經絡。經絡所藏者。無非氣血。氣血若爲風火濕痰阻滯。必有疼痛之症。有疼痛之症。乃是身痛之痺症。非是半身不遂。半身不遂無疼痛之症。余平生治之最。多。從未見因身痛痺症而得半身不遂者。由此思之。又非風火濕痰所中。

半身不遂本源

或曰。君言半身不遂。虧損元氣。是其本源。何以虧至五成。方病。願聞其說。余曰。夫元氣藏於氣管之內。分

佈周身。左右各得其半。人行坐動轉全仗元氣。若元氣足則有力。元氣衰則無力。元氣絕則死矣。若十分元氣虧二成。剩八成。每半身仍有四成。則無病。若虧五成。剩五成。每半身只剩二成半。此時雖未病。半身不遂已有氣虧之症。因不疼不癢。人自不覺。若元氣一虧。經絡自然空虛。有空虛之隙。難免其氣向一邊歸併。如右半身二成半歸併於左。則右半身無氣。左半身二成半歸併於右。則左半身無氣。無氣則不能動。不能動名曰半身不遂。不遂者不遂人用也。如睡

時氣之歸併。人不能知覺。不過是醒則不能翻身。惟  
睡醒時氣之歸併。自覺受病之半身。向不病之半身  
流動。比水流波浪之聲尤甚。坐時歸併身必歪。行  
走時歸併。半身無氣所以跌仆。人便云因跌仆得半  
身不遂。殊不知非因跌仆得半身不遂。實因氣虧得  
半身不遂。以致跌仆。

### 口眼歪斜辨

或曰。半身不遂。旣然無風。如何口眼歪斜。余曰。古人  
立歪斜之名。總是臨症不細心審查之故。口眼歪斜。

並非歪斜。因受病之半臉無氣無氣則半臉縮小。一眼無氣力不能圓睜。小眼角下抽。口半邊無氣力不能開嘴角上抽。上下相湊乍看似歪斜。其實並非左右之歪斜。嘗治此症。凡病左半身不遂者歪斜多半在右。病右半身不遂者歪斜多半在左。此理令人不解。又無書籍可考。何者人左半身經絡上頭面從右行。右半身經絡上頭面從左行。有左右交互之義。余亦不敢爲定論。以待高明細心審查再補。

又曰。口眼歪斜盡屬半臉無氣乎。余曰。前論指兼歪

身不遂而言。若壯盛人無半身不遂。忽然口眼歪斜。乃受風邪阻滯經絡之症。經絡爲風邪阻滯。氣必不上達。氣不上達頭面。亦能病口眼歪斜。用通經絡散風之劑。一藥而愈。又非治半身不遂方之所能爲也。辨口角流涎非痰飲。

或曰。口角所流非痰飲乎。余曰。嘗治此症。見所流盡是清水。並非稠痰。明明氣虛不固。津液不明。此理試看小兒氣不足時。流涎者十有八九。高年人氣衰時。流涎者十有三。再以他症互相參看。流涎者屬氣



虛無疑。

辨大便乾燥非風火

或曰。患半身不遂。兼大便乾燥。古人名曰風燥。言其病有風有火。有是理乎。余曰。若是風火。用散風清火。潤燥攻下藥。大便一行。風散火清。自當不燥。嘗見治此症者。誤用下藥。下後乾燥更甚。總不思平素出大恭時。並非大恭順谷道自流。仍用氣力催大恭下行。既得半身不遂之後。無氣力使手足動。無氣力使舌言。如何有氣力到下部催大恭下行。以此推之。非風